



## Ons vermeerder God se vreugde!

Nuusbrief van Agter-Paarl Geloofsgemeenskap  
Johannes Nortier

Nuusbrief Donderdag 12 November 2020

### Gedagte van die week:

Die koninkryk van God kom nie orals en altyd op dieselfde manier nie, want God se koninkrykskinders is nie almal en oral en altyd dieselfde nie.

### Vertrekpunt:

Matteus 25:14-30

### Meditasie uit die teks:

Die eienaar van die besittings in die gelykenis ken sy slawe. Hy ken elkeen se vermoë en bekwaamheid. Soos dit 'n goeie werkgewer pas handel hy met elkeen dienooreenkomstig. Die eienaar/werkgewer het so 'n hoë dunk van sy werkers dat hy al sy goed, sy koninkryk, aan hulle toevertrou. Die eerste twee slawe verstaan dit en spring dadelik aan die werk. Hulle verstaan die vertrouenskompliment en sit skouer aan die wiel en verdubbel die deel van die koninkryk wat aan hulle toevertrou is. Uiteindelik, wanneer die eienaar terugkeer, deel hulle in die vreugde van die verdubbelde koninkryk. Dan deel hulle nie volgens bekwaamheid nie, maar dan dan deel hulle gelykop! Die derde slaaf leef met 'n misverstand ... hy dink dat omdat die eienaar nie saam met hulle op die land saai en plant nie, hy 'n harde man, is en daarom leef hy in 'n verlamme vrees vir die eienaar en stol hy die gedeelte wat aan hom toevertrou is. En so mis hy die vreugde van die eerste twee wat deel in die verdubbelde koninkryk. Ek hoor dat God nie sy koninkryk aan ons toevertrou met die bedoeling dat dit vir ons 'n pyn en las moet wees nie, maar dat Hy dit juis aan ons toevertrou as 'n weg waarlangs ons baie vreugde kan skep. God se bedoeling is nie dat dit ons moet verlam van vrees nie, maar dat dit ons opgewonde tot "dadelijke" deelname moet bring. Die uitbreiding en vermeerdering (verdubbeling) van God se koninkryk is nie nét vir God nie, dit is ook vir ons. 'n Goeie boer en sy werkers juig saam oor 'n groter oes! 'n Goeie God en sy kinders juig saam oor 'n verdubbelde koninkryk. Wanneer ons elkeen op ons eie manier en op ons eie tyd en op ons eie plek die liefde en genade en vrede en bedagsaamheid en omgee en deernis verdubbel ... dan verdubbel ons vreugde ook. So skep ons saam aan die koninkryk van die glimlaggendes!

### Youtubeskakel:

Ons gaan voorlopig voort met ons Youtube-uitsendings. Jy sal een of ander tyd op Sondag, na afloop van ons reisgesprek by die kerkgebou, via whatsapp 'n Youtube-skakel ontvang.

### Meditasie uit die lewe:

Tydens my 14 dae verlof wat ek in Sabie by my kinders deurgebring het, was dit nie vir my nodig om te dink oor wat God uit 'n Bybelteks vir my en ons wil sê nie. Ek het nie gelees uit Genesis 1 of Matteus 25 of Romeine 13 nie. Ek het sommer gelees uit Sabie 1-14. Die tekste was iets soos, "maak vir jou dogter tee, sorg dat die waterbottel langs haar bed vol is, gaan haal die huilende kleinseun en sus hom, maak vir jou kinders snoek en patat, maak die garagedeur reg, pak jou skoonseun se gereedskap reg, hang die wasgoed op, steriliseer die bottels ..." **Wanneer ander se behoeftes die Godstekste van jou lewe word is jy dalk nader aan Jesus as wanneer jy slim ontledings van Bybeltekste maak.** Toe ek Saterdag 7 November op die vliegtuig klim was ek so vol vrede en vreugde ... toe hoor ek sommer in die vliegtuig Matteus 25 se, "Mooi so! Jy is 'n goeie en getroue slaaf. Oor min was jy getrou, oor baie sal ek jou aanstel. Kom in en deel in my vreugde!" Op die vliegtuig tussen Nelspruit en Johannesburg **ervaar** ek toe hierdie vers vir die eerste keer: Vreugde, dubbele vreugde!!! Ek sit in sitplek 10C en bekijk die wêreld van bo en ervaar 'n diep saligheid.

## Huwelikseminaar

Theuns Stoffberg, die oud-Sprinkbokkaptein, is 'n Imago-verhoudingsterapeut. Hy bied die laaste naweek van November 2020 'n huweliksverrykingsseminaar aan te Stellenbosch. Dit sal duur van die Vrydagmiddag tot die Sondagmiddag om 12:00. Vir R 3500 kry jy twee nagte se huisvesting, ontbyt en aandete. Sy telefoonnommer waar jy kan bespreek is 082 213 6726. Maak gerus hiervan gebruik. Ek kry positiewe terugvoer van mense wat hom besoek het.

## Die toekoms! (lees asseblief hieronder ... belangrike inligting)

Dit is 'n dapper opskrif, want wat weet ons van die toekoms? COVID het ons geleer om nederiger en minder selfversekerd te wees. Die lewe gaan wel aan en ons moet probeer om aan te pas. Hier volg dan die nuutste en voorlopige reëlins vir ons reisgesprekke:

1. Ons begin **Sondag 18 Oktober 2020 om 09:30** met ons reisgesprekke in/by die kerkgebou.
2. Ons kan gemaklik 250 mense binne die kerkgebou ontvang en die res kan buite op die grasperk tussen die kerkgebou en skoolgebou sit. Die kerkgebou gooi 'n redelike area skaduwee tussen 09:30 en 10:30. Jy mag wel 'n sonsambreel of gazebo saambring as jy wil. Ons sal tuinbanke en stoele beskikbaar stel. Jy mag jou eie kampstoel bring as jy wil. Daar sal klank en beeld buite wees sodat almal alles kan hoor en die powerpoint kan sien. Julle mag komberse en kussings saambring as julle op die gras wil sit, want daar mag dalk bietjie dou op die gras wees. Nuwe tye bring nuwe maniere!!!
3. Op Sondag 18 Oktober sal ons na afloop van die reisgesprek vir elkeen 'n klaargepakte boksie met lekkernye aanbied. Ons kuier dan sonder enige haas saam op die grasperke. Ons kyk mekaar weer met liefde in die oë!!!
4. Aangeheg aan die nuusbrief kry jy 'n vorm wat vir elke motor wat opdaag ingevul moet word. Jy vul dit by die huis in en ons kry dit by jou by die motor. Ons word verplig om rekord te hou van wie almal bywoon. Daar sal wel ekstra vorms in die voorportaal wees vir diegene wat dit nie by die huis kan uitdruk nie. Jy mag ook sommer een neem vir die volgende reisgesprek.
5. Ons gaan nie saamsing nie, maar na mooi musiek luister.
6. Ons gaan nie dankbewyse opneem nie. Ons verkies dat ons steeds voortgaan met EFT inbetalings. Indien jy nie 'n EFT kan doen nie, mag jy kontant in 'n koevert plaas en dit in die skatkis in die voorportaal plaas.
7. Ons gaan almal 'n masker byderhand hê en dit met verantwoordelikheid dra en afhaal.
8. Ons gaan ons hande saniteer by die aangewese punte.
9. Ons gaan sosiale afstand respekteer. Ons mag wel in gesinsverband naby mekaar wees.
10. Ons gaan nie handskud en drukkies gee nie (al wil ons hoe graag!)
11. Daar sal wel kleuterkerk in die saal wees, maar geen kinder- en tienerbediening nie.
12. Die Belydenisklas sal weer op 8 November in die sitkamer begin.
13. **Ons wil GEDULDIG EN VERDRAAGSAAM wees met mekaar. Dit is vir ons almal vreemd, maar ons het mos genoeg genade gekry om genoeg genade te gee.**
14. As jy enige vrae het, skakel gerus met Lise, Toit of Johannes. Welkom!

As jy hierdie epos foutiewelik ontvang of dit nie meer wil ontvang nie, stuur net 'n epos wat lui "kanselleer nuusbrief" na [ngkagterpaarl@telkomsa.net](mailto:ngkagterpaarl@telkomsa.net) of [jin1@telkomsa.net](mailto:jin1@telkomsa.net)